

Date – 16/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl Municipal Corporation-AMC inthlan atana Home Voting neih mekah mi 2570 in vote an thlak tawh a, vawiinah zawh fel hman beisei a ni.
2. Ministry of Health & Family Welfare hmalaknaa TB umbo beihpui thlak mek "100 Days Campaign" chu Mizorama hmun hrang hrangah ngawrh taka kalpui mek a ni.
3. Ni thum awh Parliament Budget session abika thutkhawm chu vawiinah tan a ni dawn.
4. BJP hruaitu Samrat Choudhary chu Bihar Chief Minister thar atan lakluh a ni.



HOME VOTING

Aizawl Municipal Corporation-AMC inthlan atana Home Voting neih mekah mi 2570 in vote an thlak tawh a, vawiinah zawh fel hman beisei a ni.

Akashvani News Aizawl thudawn danin nimin tlai thlenga Home Voting kaltlanga vote thlak hi mi 1986 an tling tawh a, za zela 92.85% in Home Voting tura in report mi 154 awmlo an awm a, Vote thlak tur hi mi 44 la awmin Home Voting hi vawiin thleng kalpui ani dawn a ni.

Home Voting ah hian nimin khan mi 584 in vote an thlak a, Home Voting atan hian kum upa te, damlo natna khirh bik nei polling station pan theilo te leh pianphung a rualbanlo polling station pan theilo te tan ruahman a ni a, AMC Ward 19-ah kalpui vek tur a ni a, Ward tinah Home Voting Team pakhat theuh awm in, Home Voting ti tura dilna lut zat hi 2768 a ni a, ni 4 chhung a vote thlak hi zawh hman tura ruahman a ni, Municipal Ward – 2 ah dilna hi lut tamber in diltu mi 209 an awm a ni.



SAMTHANG

Champhai District a Samthang Zopui-a Sevullhtuten an Se no Chinghniain a sehsak thin avangin an mangan thu an sawi a, sawrkar atanga zangnadawmna an dil chu pek thuai an duh thu an sawi.

Samthangah hian chhungkaw 56 velin Sial an vulh thin a, Chinghniain an Se no a seh sak thin avangin tunah hian chhungkaw 27 chauhin Sial hi an vulh tawh a,

Kum 4-5 vel atangin Chinghne rual hian Samthang ram a chenchilh avangin chhungkaw chawmna tur atana Ran vulh hi a harsat thu sawiin Chinghne rual hian Se no 150 chuang an seh sak tawh nia hriat a ni.

<><><>

AYUSHMAN AROGYA SHIVIR

Ministry of Health & Family Welfare hmalaknaa TB umbo beihpui thlak mek "100 Days Campaign" chu Mizorama hmun hrang hrangah ngawrh taka kalpui mek a ni.

He campaign ah hian TB hluar theihna hmun bika ngaih "High Risk Village/Ward" te chu ngaih pawimawh a ni a. Heng hmunah te hian mipuite screen vek tura tih a ni a, heng bakah hian TB vei awlsam bika ngaih zunthlum nei, meizu, zu in mi, kum 60 chunglam, Chuap TB damlo chenpui te chu endik ngun bik niin TB venna damdawi chu mipui tam thei ang ber hnenah pek a ni bawk. Thuneitute sawi danin Aizawl khawpui chu High Risk Ward veka chhiar a ni a. TB inkaidarh awlsamna hmuna a huhova awmkhawmna leh hnathawhna hmun hrang hrang ah screening hi kalpui vek tur a ni bawk.

Sawrkar thuchhuah tarlan danin March 24 atanga April 12 thlenga 100 days campaign dinhmun tarlan angin - High Risk village awm zat - 185, Screening camp nei tawh zawng zawng zat - 57, Urban area a screening neih zat - 11, Rural area a screening neih zat - 46, Mipui inentir tawh zat : 4003, Xray hmanga test zawng zawng zat : 1777 an awm a, heng atang hian TB hmuhchhuah zat - 86, TB venna (TPT) pek zat - 355 an awm a ni.

<><><>

WOMEN RESERVATION

Hmeichhiate tana rorelna ina seat zaa 33 hauhsakna tur Nari Shakti Vandan Adhinyam thlawpna lantir nan BJP Mizoram chuan Two-Wheeler Rally buatsaihin, Aizawl Vanapa Hall kawt atanga Sikulpuikawn ah kalin, BJP State Office, Mipui Rûn, Upper Republic-ah hun tâwp hman a ni.

BJP State Jt Treasurer & Nari Shakti Vandan Adhinyam State Convener Pi Lalremsangi Fanai chuan, Prime Minister Pu Modi kaihhruai hnuaiah Women's Reservation Bill hman theih tura, sawi ho a ni dawn ta chu a lawmawm hle a, Two-Wheeler Rally-a lo tel te chu BJP an nih vang ni lovin, Women's Reservation Bill tha an tih vang a ni a, nakin lawk ah chuan Mizo hmeichhia MLA tam tak an la nei dawn a, hmeichhiate hmakhaw ngaitu PM Modi kaihhruaina hnuaiah President mai bakah Union Finance Minister hmeichhia an awm a, ram hruaitu nihna pawimawh tak tak hmeichhiate pek an ni zel a ni," a ti.

BJP Mizoram Presesident Dr. K. Beichhua chuan Mizoram hma lam hun thui tak hril thei tur Women's Reservation Bill hman theih a nih dawn tak avangin, Mizo hmeichhia ram leh hnam tana hmala duhte chuan tun hma aia nasa zawka inbuatsaih a ngai ta a, MLA Seat tam zawk hmeichhiate tan a nih tawh dawn avangin, Mizo Hmeichhiate aiawha ding thei tur khawpa lo inbuatsaih a pawimawh a ni a ti.



I&B

Ministry of Information & Broadcasting hnuai Press Information Bureau bultumin nimin khan Aizawl Press Club-ah Chhiarpui 2027 buaipuitu Directorate of Census Operations leh State Nodal Department - GAD hotuten thuthar thehdarhtute an kawm a; Mizoram mipuite chu chhiarpui neih meka thawktute tha taka thawhpui tur leh chhiarpui titute ID Card enfiah hmasa thin turin an chah.

Directorate of Census Operation director Vinod P. Kavle chuan vawiin atangin chhiarpui atana Houselisting & Housing (HLO) kalpui tan a nih dawn thu a sawi a; HLO kalpui turah chhiarpui buaipuitute tha taka thawhpui tura mipui chahin, chhiarpui atana zawhna an neihte pawh tha taka chhang turin a ngen a ni.

Chhiarpuiaah hian a thawh hnihnaah mihring chhiar tur a nih thu leh nakum lamah kalpui tur a nih thu an sawi a, mihring chhiarnaah hian ram chungka khawsa mi tupawh, India mi leh sa ni lote pawh chhiar tel vek an nih dawn thu leh, Mizoram mi leh sa, state danga hna emaw, zirna emaw avanga awmte chu an awmna state ah theuh chhiar tel an nih dawn thu an sawi bawk. Chhirpui neih mekah hian Se.Census.gov.in ah mahni a inziahlul theih a ni.



MIZO MARRIAGE AND INHERITANCE

Mizo Inneih, Inthen leh Rokhawmna Dan enawnna Review Committee chu an Chairman Pu Zahmingthanga Ralte, Law & Judicial Department-a Addl. Secretary hoin Chief Secretary Conference Hall-ah nimin khan an thukhawm.

Kum 2026 Assembly Session hnukung berin a pass, Mizo Inneih leh Rokhawmna Dan siamthatna - the Mizo Marriage and Inheritance of Property (Amendment) Act chuan Mizoram mipuite zingah ngaihdan hrang hrang, a thlawp zawng leh sawiselna lam te a piang a. Mizoram Sorkar chuan heng ngaihdan leh sawiselna te hi a dik leh dik lo te zirchianga, engtia kalpui tur nge tih uluk taka zir tura a tih angin Review Committee thutkhawm hi koh a ni. Nimin thutkhawma ngaihtuah zingah hian MHIP General Headquarters-in Assembly Speaker hnena an lungawilohna leh en tha tura an ngenna lehkha te, Val Upa Council-in Chief Minister hnena en that an ngenna leh rawtna an thlen te pawh a tel a.

Chairman Pu Zahmingthanga Ralte chuan sawiselna leh ngaihdan hrang hrang te chu uluk takin zir a ni a, a then chu thil niawm tak ni a a lan laiin, tam tak sawiselna erawh thil hriatchian tawk loh vang a ni, a ti. The Mizo Marriage and Inheritance of Property (Amendment) Act, 2026 chu Mizoram Gazette-ah March ni 6 khan chhuah niin hemi ni atang hian hman nghal a ni a. Chairman chuan “Kohhran hrang hranga Inneihna kawltu zawng zawngin an hriat tur chu, he dan hnuaiyah hian nupui pasal then tawhin midang an neih leh dawn chuan Court atangin Divorce Certificate an neih ngei ngei a ngai a, chutiang nei lova nupui pasal dang nei chu BNS Sec.82 angin kum 7 thleng lung in tan leh pawisa chawia hrem theih an ni dawn”, a ti a. Fimkhur taka inneihna kalpui turin a chah a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



MNF STREET CAMPAIGN

MNF AMC Candidate Pi R Lalnunthari'n khawtlang leh ram hmangaih chu mitin tihur anih avangin a thiamna leh hmachhawp a tih hlawhtlin theih nan mipuite vote turin a sawm.

Nimina Campaign na ah he thu hi sawiin Pi R. Lalnunthari chuan Aizawl khawpui nuam leh changkang zawk siam zel an tum thu a sawi a, Aizawl khawpui chu hawisan an tumlo tih sawiin dinhmun sang zawka hlankai an tum thu a sawi bawk.

Byte of Pi R. Lalnunthari

Pi R Lalnunthari chuan AMC Inrelbawlna tha zawk leh chak zawk siam tum a ni tiin AMC hnuaia Development hnathawh reng reng kut tling leh mawi, belhchian dawl a nih zel theih nan hmalak chhonzawm a ni dawn a ti a, AMC sorkar chak zawk leh langtlang din chhonzawm tum a nih thu sawiin AMC huam chhungah khualzin leh pem lut an pun zel avangin Aizawl khawpuia cheng dik takte chhinchhiaha (Population Registration) uluk zawka kalpuiin - nau piang, mitthi leh pem lutte chhinchhiaha an tum a ti a, Aizawl khawpui veng hrang hrangte leimin leh lei tlahniam laka a him zawk nan tuihawk luankawr tha zawk leh a khuhna siam belh an tum tih sawiin heng ti hlawhtling tur hian MNF Candidate te thlang tling turin mipuite a sawm a ni.



PARLIAMENT

Ni thum awh Parliament Budget session abika thutkhawm chu vawiinah tan a ni dawn. He session ah hian ram danpui siamthatna tur hmeichhiate ram rorelnaa seat hauhsak chungchang Nari Shakti Vandan Adhinyam chungchang sawiho a ni dawn a. Sarwkar chuan dan siamthat rawtna pathum a pulut dawn a. Kum 2023-a pass tawh hmeichhiate tana Lok Sabha leh State Assembly-a seat zaa 33 hauhsakna tur ataka hmanna tur a ni ang.



BIHAR

BJP hruaitu Samrat Choudhary chu Bihar Chief Minister thar atan lakluh a ni. Nimina Patna-a Lok Bhavan-ah rinawmna thutiam tira lakluh a ni a. Pu Choudhary hi BJP hruaitu zinga Bihar Chief Minister ni thei hmasa ber a ni.

Chief minister lakluh anih rual hian Janata Dal (United) senior leader Vijay Kumar Choudhary leh Bijendra Prasad Yadav te chu Deputy Chief Minister atan lakluh an ni bawk.

Prime Minister Narendra Modia chuan Chief Minister thar Samrat

Choudhary a lawmpui thu a sawi a. Deputy Chief Minister Vijay Kumar Chaudhary leh Bijendra Prasad Yadav te pawh a lawmpui thu a sawi bawk a ni.

<><><>